

INFORMAZION

La Usc di Ladins rua te Parlament

Do la letra de protesta manèda fora da la Union Generela di Ladins dla Dolomites, editora del sfoi, la senatora Elena Testor ge à fat na interrogazion al Minister Giancarlo Giorgetti

La Usc di Ladins l é n sfoi local generèl che va tratà desche n sfoi da duc i dis. L é stat uzà fora bel chièr te la letra de reclam che la Union Generela di Ladins dla Dolomites, editora de La Usc di Ladins, ge à manà fora ai prumes de oril a la direzion e ai responsaboi de Poste Italiane e ai raprejentanc istituzionèi e politics ladins te sia desvaliva sentes.

»L é da egn che va inant l mèl servije con La Usc di Ladins che no vegn consegnèda te la cèses di aboné de vender, ma de sabeda o adertura de lunesc o mèrtesc – se lec te la letra. L é stat fat desvaliva protestes, tant per telefon che per scrit ai responsaboi de la Postes, tant te la provincia de Trent che de Busan, ma l é stat responnet demò con emprometudes che no se à mai realisà. La Usc di Ladins l é n sfoi che publica informaziions atuales sui servijes de la istituzions ai sentadins, la families, la firmes e



La senatora Elena Testor.

la soziaions e se chestes no les rua per temp, dut l lurier di profescionisc che loara te la redaziions vegn vanificà. Ti ultimes tempes – se lec amò te la

letra – l é stat n muie de desdites de abonamenc per via che l sfoi rua tardif e ence n smendrament de reclames e de anuzies de lurier. L dan l é gran per La Usc di Ladins, ma ence per dut l setor giornalistic e per i servijes dac su a de outra firmes. Nosc despiajer per chest mèl servije l é amò più gran se pisson che la provincia de Busan, olache vegn stampà La Usc, sostegn ogne an con n contribut de 7,5 milions de euro n pachet de prestaziions per l sentadin che tol ite ence la consegna di sfoes locai sie dis sun sie.»

La protesta per l mèl servije de consegna rua ence tel Parlament

La letra de malcontent ge é stata manèda ence a la senatora ladina Elena Testor che enstadi l'à fat a saer de ge aer portà dant na interrogazion al Minister del svilup economich Giancarlo Giorgetti.

»La Usc di Ladins, enceben che sie n setemanal, vegn spetà ogne vender da n bon numer de aboné – scrif Elena Testor te sia interrogazion. Per sie carater informatif e per la creazion de sezions dedichèdes a consees pratics con consulenzes specifiches utoles ence ai servijes che la istituzions met a la leta di sentadins, de la families, de la firmes e de la soziaions de voluntariat sozio-culturèl, no se pel no tegnir cont de sia funzion sozièla e de sia miscion ti confronc de la comunanza. Enceben chest, se seghita a veder n mèl servije te la consegna puntuala del sfoi e chest à portà a n gran numer de desdites de abonamenc con consequenzes economiches.»

La senatora Testor te sia interrogazionla recorda ence che »per chel che vèrda la defendura de la mendranzes linguistiche storiches, aldò de la lege dai 15 de dezember del 1999, nr 482, articoi 1 e 2, en atua-

zion del articol 6 de la Costituzion e aldò di prinzipies generèi stabelii dai organismes europeans e internazionèi, la Republica talièna cogn se dèr ju per la defendura del patrimonie linguistiche e culturèl de sie lengaz, sostegnan la valorisazion del lengaz e de la cultures de mendranza, anter chestes proprio chela ladina.»

Testor ge domana al Minister Giorgetti se »no l enten meter a jir defata provedimenc per troèr na soluzion al mèl servije de Poste Italiane, percheche vegne durà a na vida giusta e coreta la resourses publiche con benefize de la mendranza ladina.»

Da dir che te la Provincia de Trent, do da la ultima segnalaziions e protestes, te la ultima setemènes la consegna é stata fata puntuala de vender. Se spera che l servije vegne mantegnù e che l sfoi seghite a vegnir consegnà de vender a duc i aboné, ence te la Provincia de Busan. MCI